

**Husam Musa Bebas Tahanan Reman Dengan Jaminan
Bernama
24 Jun, 2013**

KOTA BAHARU, 24 Jun (Bernama) -- Naib Presiden PAS Datuk Husam Musa yang ditahan reman mengikut Akta Hasutan 1948 berhubung kenyataannya mengenai 'mati syahid' dibebaskan oleh Mahkamah Majistret di sini Isnin dengan jaminan.

Majistret Nik Habri Muhamad memerintahkan Husam dilepaskan dengan seorang penjamin dan beserta wang jaminan RM3,000 selepas tempoh reman selama dua hari berakhir.

Nik Habri mengeluarkan perintah itu di Ibu Pejabat Polis Daerah Kota Baharu iaitu tempat Husam direman, yang dijadikan Mahkamah Majistret sementara.

Husam, 54, ditahan Sabtu lepas di Kampung Pandan, Ampang, Selangor oleh polis dan kemudiannya dibawa ke Kota Baharu pada hari yang sama.

Dia ditahan reman untuk membantu siasatan mengikut Seksyen 4(1)(b) Akta Hasutan 1948 berhubung kenyataannya seperti yang dilaporkan media rasmi PAS, sekiranya peserta terkorban ketika menyertai perhimpunan Black 505 di Padang Merbok, Kuala Lumpur Sabtu lalu dianggap sebagai 'mati syahid'.

Semalam polis membuat permohonan untuk menahan reman Husam yang juga anggota Dewan Undangan Negeri kawasan Salor melalui Pegawai Penyiasat ASP Noland A/L Janah.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=958490>